

## BUĆE

Saku nedilju od jutra do noće  
zada birtije igraju buće  
popiju bocun vina  
koštajuć do bulina.

Okolo ljudi stari  
delaju komentari  
ki j mogal dobit foru  
da j hodil s punti zgoru.

Nikad ni j fori kraja  
ako se samo zgaja  
sakomu j sada stalo  
k bulinu koštat pomalo.

Puten prohaju ženi  
s košarun i s brimeni  
pa kad muža obliče  
s puta na njega kriče.

Usahle ti se nogi  
na ton prokljeton jogi  
vrag zel tebe i buće  
jutros si odšveril z kuće.

A kad već dosta zaškuri  
saki se doma žuri  
pa kad pride do kuće  
po vražju plati buće.